

आकाशवाणी जयपुर-अजमेर

प्रादेशिक समाचार

- मुख्यमंत्री भजन लाल शर्मा कह्यो-बजट मांय ऐलाण करी ज्या 10 संकल्पां रो मकसद सगळा तबकां रो विकास करणो है।
- प्रदेश रा नुवा बणायी ज्या राज्यपाल हरिभाऊ किसनराव बागडे ने 31 जुलाई बुधवार ने शपथ दिरायी जावेला।
- अन्तर्राष्ट्रीय बाघ दिवस रे मौके प्रदेश मांय बाघ बचावण ऊं जुड़ी जाग जगावण सारू कार्यक्रम राख्यी ज्या।
- राज्य मांय कठे-कठे चोखी बिरखा- मौसम विभाग डूंगरपुर अर सिरौही जिलां मांय घणी जोरदार बिरखा रो ऑरेंज अलर्ट जारी कीनो।

000

मुख्यमंत्री भजनलाल शर्मा कह्यो है के बजट मांय ऐलाण करी ज्यी 10 संकल्पना रो मकसद प्रदेश री जनता री खुशहाली सागे सगळा तबकां रो विकास है। मुख्यमंत्री आज विधानसभा मांय राजस्थान विनियोग विधेयक 2024 माथे व्ही चर्चा रो जवाब दे रह्या हा। वे कह्यो के बुनियादी ढांचा अर उद्योग धंधां रा विकास ऊं माली व्यवस्था मजबूत बणेला अर सगळा तबकां ने इण रो फायदो मिलेला। मुख्यमंत्री विपख माथे केई मुद्दां माथे भ्रम फैला र जनता ने गुमराह करण री कोशिश करण रो आरोप मांड्यो। मुख्यमंत्री कह्यो के प्रदेश मांय कांग्रेस रा राज मांय ई केई योजनावां रा नाम बदल्या ज्या हा। चर्चा मांय सिरकत करता थकां सदन मांय विपख रा नेता टीकाराम जूली कह्यो के कांग्रेस रा राज मांय प्रदेश मांय मोटी तादाद मांय भ्रष्ट अहलकारां अर कर्मचारियां रे खिलाफ मामला चलावण री मंजूरी दीरीजी ही, जदके मौजूदा राज मांय मोटी तादाद मांय प्रकरण दर्ज करण री मंजूरी रा मामला माथे हाल ई सरकार विचार ही कर रही है।

वे सफाई कर्मचारियां री भर्ती मांय बाल्मिकी समाज रा लोगां ने तवज्जो देवण, संविदा रा आधार ऊं काम कर रह्या कर्मचारियां ने नियमित करणा, वेतन विसंगतियां दूर करण अर अनुसूचित जाति अनुसूचित जनजाति तबका रा उम्मीदवारां सारू बाकी जूनी भर्तियां करण री मांग ई कीनी।

00000

राज्य सरकार हाईकोर्ट रा हुकम री पालना मांय जयपुर कने रामगढ़ बंधा ऊं जुड़्या बहाव हलका अर जल ग्रहण हलका मांय निगराणी सारू जयपुर रा जिला कलेक्टर री सदरत मांय समिति बणायी है। जल संसाधन मंत्री सुरेश सिंह रावत आज विधानसभा मांय आ जाणकारी दीनी। वे बतायो के आ समिति बांध रा जल ग्रहण हलका मांय अड़चनां अर अतिक्रमणां रा चिह्नीकरण अर हटावण री कार्यवाही नियमानुसार करी जा रही है। मंत्री बतायो के पूरा बहाव हलका मांय मौजूद अड़चनां अर गैर कानूनी कब्जा रो रिमोट सेंसिंग अर ड्रोन ऊं सर्वे करायो जावेला। रावत शून्यकाल रे दौरान विधायक कालीचरण सराफ रा ध्यान आकर्षण प्रस्ताव माथे जवाब दे रह्या हा। मंत्री बतायो के हाई कोर्ट रा हुकम रे मुजब 2 मीटर ऊं बत्ता ऊंचा एनिकट तोड़ र वां री उंचाई 2 मीटर ताई सीमित कर दीरीजी है।

000

राज्य री ढाणियां मांय ट्रांसफॉर्मर्स माथे बिजली रो भार मुफ्त बधावण सारू राज्य सरकार कोशिश करेला। ऊर्जा राज्य मंत्री हीरालाल नागर आज विधानसभा मांय प्रश्नकाल रे दौरान सदस्यां रा पूरक सवालां रा जवाब मांय आ जाणकारी दीनी। वे साफ कीनो के मौजूदा दौर मांय गैर आबादी हलकां मांय बसी ढाणियां मांय नुवा बिजली कनेक्शन सारू ग्राहकां ने खुद रा खर्च ऊं ट्रांसफॉर्मर रो लोड बढवावणो पड़े है। आबादी हलका मांय ओ काम बिजली निगम री ओर ऊं मुफ्त कर्यो जावे है।

000

सामाजिक न्याय अर अधिकारिता मंत्री अविनाश गहलोत आज विधानसभा मांय बतायो के राज्य सरकार री कोशिशों ऊं अब सामाजिक सुरक्षा पेंशन रा चुकारा री लंबित अवधि एक महीना रह गयी है। वे कहयो के राज्य मांय पैली वाळी सरकार री बगत आ अवधि तीन महीना ऊं बत्ती ही। गहलोत बतायो के राज्य सरकार कानी ऊं पेंशन री रकम मांय 15 फीसदी बधोतरी कर र इण ने 1000 रूप्या ऊं बधा र 1 हजार 150 रूप्या कर दीरीजी है। सामाजिक न्याय अर अधिकारिता मंत्री प्रश्नकाल रे दौरान पूछी ज्या पूरक सवाला रा जवाब मांय आ जाणकारी दीनी। वे कहयो के राज्य सरकार 89 लाख पेंशनरां रा खाता मांय 1 हजार 37 करोड़ रूप्या री रकम रो चुकारो सीधा खाता मांय कीनो है।

0000

प्रदेश रा नुवा बणायी ज्या राज्यपाल हरिभाऊ किसनराव बागड़े ने बुधवार 31 जुलाई ने जयपुर रा राजभवन मांय राख्या जावण वाळा जळसा मांय शपथ दिरायी जावेला। नुवा राज्यपाल बागड़े ने राजस्थान हाई कोर्ट रा मुख्य न्यायाधीश न्यायमूर्ति मनिन्द्र मोहन श्रीवास्तव शपथ दिरावेला। राज्यपाल रा सचिव गौरव गोयल आ जाणकारी दीनी।

000

राज्यपाल कलराज मिश्र ढांढा ढोर राखण वाळां री आमदनी बधावण सारू योजना बणा र काम करण री जरूरत बतायी है। वे आज बीकानेर रा राजस्थान पशुचिकित्सा अर पशु विज्ञान विश्वविद्यालय रा दीक्षांत समारोह मांय बोल रह्या हा। राज्यपाल पशुचिकित्सा अर पशु विज्ञान विश्वविद्यालय रा तैत ऐडा कोर्स विकसित करण माथे जोर दीनो, ज्यां ऊं पशुधन ने बचावण सागे ई वां रा उत्पादां री पोषकता मांय गुणात्मक बधोतरी हो। राज्यपाल कह्यो के प्रदेश मांय ढांढा रा डॉक्टर, पशुचिकित्सा विज्ञान अर पशुपालक माली व्यवस्था रा खास हिस्सा हैं। दीक्षांत समारोह मांय 665 डिग्रियां अर 27 तमगा दिया ज्या।

000

केन्द्र सरकार कह्यो है के देश मांय डीज़ल अर पेट्रोल रो मोल दूजा देशां री तुलना मांय सब ऊं कम है अर इण रा मोल मांय कमी आयी है। राज्यसभा मांय प्रश्नकाल रे दौरान पूरक सवालां रा जवाब मांय पेट्रोलियम मंत्री हरदीप सिंह पुरी कह्यो के पाकिस्तान, बांग्लादेश, श्रीलंका अर नेपाल रे मुकाबले भारत मांय तेल रा मोल मांय बधोतरी रो प्रतिशत कम है। वे सदन ने बतायो के सरकार साल 2030 रा आखिर ताई पेट्रोल मांय 25 प्रतिशत इथेनॉल मिलावणो तैय कीनो है।

000

आज अंतर्राष्ट्रीय बाघ दिवस है। ई मौके नई दिल्ली मांय राष्ट्रीय बाघ संरक्षण प्राधिकरण री 25वीं मीटिंग राख्यी ज्यी। मीटिंग री सदरत करता थकां वन अर पर्यावरण मंत्री भूपेन्द्र यादव बाघ बचावण मांय स्वदेशी प्रौद्योगिकी काम लेवण री संभावना तलाशबा री जरूरत माथे जोर दीनो। अंतर्राष्ट्रीय बाघ दिवस रे मौके आज प्रदेश मांय न्यारा-न्यारा कार्यक्रम राख्यी ज्या। जयपुर रा नाहरगढ़ जैविक उद्यान मांय राख्यी ज्यी न्यारी-न्यारी होडां मांय छःठी ऊं बारहवीं कक्षा ताई रा करीब अढाई सौ विद्यार्थी सिरकत कीनी। जयपुर चिड़ियाघर रा उप वन संरक्षक जगदीश गुप्ता बतायो के ई मौके प्रश्नोत्तरी, व्याख्यान अर कोलाज बणावण री होडां राख्यी ज्यी अर जीतण वाळा पहला तीन जणां ने ईनाम दे र नवाजी ज्या। ई मौके विद्यार्थियां ने बाघां ने बचावण रा जतन रा बारा मांय जाणकारी दीरीजी। ई मौके पौधा ई रोप्यी ज्या। सवाईमाधोपुर मांय ई वन विभाग री ओर ऊं कार्यक्रम राख्यी ज्यो। इण मांय जिला कलेक्टर डॉ खुशाल यादव बाघ अर वां रा रहवास ने बचावण मांय स्थानीय लोगां री भूमिका माथे प्रकाश डाल्यो। वे स्थानीय ग्रामीणां मांय जाग जगावण सारू बुद्धिजीवी तबका ने न्यारी-न्यारी ठोडां जागरुकता कार्यक्रम राखण री जरूरत माथे जोर दीनो। दूजा संगठनां री ओर ऊं ई आज जागरुकता कार्यक्रम राख्यी ज्या। बाघां ने

बचावण रा बारा मांय लारला तीन दिन ऊं चाल रही पेंटिंग होड़ ई आज पूरी व्ही। ध्यानजोग है के बाघ दिवस मनावण रो मकसद बाघां रा प्राकृतिक रहवास री हिफाजत सारू वैश्विक प्रणाली ने बधावो देवण अर बाघ ने बचावण रा बारा मांय जाग जगावणो है।

00000

राज्य मांय कटे-कटे आज चोखो मेह बरस्यो। बाड़मेर मांय दोपहरां पाछे सरू व्ही बिरखा सिंज्यां ताई चालती रही। चौहटन मांय तेज बरसात ऊं कपालेश्वर महादेव मंदिर री पहाड़ी ऊं झरनो बहवण लाग्यो। मौसम विभाग आज डूंगरपुर अर सिरौही मांय घणी बिरखा रो ऑरेंज अलर्ट जारी कीनो है। चित्तौड़गढ़, बाड़मेर, उदयपुर, प्रतापगढ़ अर झालावाड़ मांय ई घणी ज़ोरदार बिरखा रा आसार है। मौसम केंद्र जयपुर रे मुजब मॉनसून री ट्रफ लाइन आज बीकानेर अर अजमेर ऊं व्हेती निकळ रही है। राज्य रा ऊगणी हलकां मांय आवता 5-7 दिन चौमासा री बिरखा व्हेती रेहवण रा आसार है। कोटा, उदयपुर, अजमेर, भरतपुर अर जोधपुर संभाग रा कुछ हलका मांय आवता दो-तीन दिन चौमासा री बिरखा चालती रेहवण अर कटे-कटे तेज बिरखा व्हेवण रा आसार है। जयपुर अर बीकानेर संभाग रा कुछ हलकां मांय आवता दो-तीन दिन बिरखा री संभावना है।

000